

四庫全書

史部

欽定四庫全書

元史卷九

明翰林學士亞中大夫知制誥兼修國史宋濂等修

本紀第九

世祖六

十三年春正月丁卯朔克潭州宋安撫使李希盡室自
焚死阿爾哈雅分遣官屬招徠未附者旬日間湖南州
郡相繼悉降得府一州六軍二縣四十戶五十餘萬一

千一百一十二口百五十三萬七千七百四十巴延軍次嘉興府安撫劉漢傑以城降董文炳軍次乍浦宋統制官劉英以本軍降辛未董文炳軍至海鹽知縣事王與賢及澉浦鎮統制胡全福建路馬步軍總管沈世隆皆降壬申改都統領司為通政院命烏蘭哈達等領之立回易庫於諸路凡十有一掌市易幣帛諸物救大都路總管府和顧和買權豪與民均輸癸酉宋相陳宜中遣軍器監劉庭瑞賁宋主稱藩表章詣軍前稟議又致

宜中等書於巴延巴延以書荅之乙亥詔諭四川制置使趙定應來朝徙大都等路獵戶成大洪山之東符寶郎董文忠請貧病者勿徙從之宋復遣監察御史劉巴賈宋主稱藩表至軍前且致書巴延為宗社生靈請命丙子賞哈噉婁台所部將士征建都功銀鈔錦衣丁丑宋遣都統洪模賈陳宜中吳堅等書請俟宗長福王至同詣軍前戊寅巴延以軍出嘉興府留萬戶呼圖克千戶王圖烈齊戌之劉漢傑仍為其府安撫使辛巳命雲

南行省給建都屯軍弓矢軍次崇德縣宋遣侍郎劉庭瑞都統洪模來迓行都元帥府宋都木達言江西隆興建昌撫州等郡雖附而閩廣諸州尚阻兵乞增兵進討敕以襄漢軍四千益之壬午軍次長安鎮董文炳以兵來會宋陳宜中吳堅等違約不至癸未軍次臨平鎮甲申次臯亭山阿嘯罕以兵來會宋主遣其保康軍承宣使尹甫和州防禦使吉甫等賫傳國王璽及降表詣軍前其辭曰人宋國主焜謹百拜奉表於大元仁明神武

皇帝陛下臣昨嘗遣侍郎柳岳正言洪雷震捧表馳詣
闕庭敬伸卑悃伏計已徹聖聽臣眇焉幼冲遭家多難
權奸似道背盟誤國臣不及知至於興師問罪宗社玷
危生靈可念臣與太皇日夕憂懼非不欲遷辟以求兩
全實以百萬生民之命寄臣之身今天命有歸臣將焉
往惟是世傳之鎮寶不敢愛惜謹奉太皇命戒痛自貶
損削帝號以兩浙福建江東西湖南北二廣四川見在
州郡謹悉奉上聖朝為宗社生靈祈哀請命欲望聖慈

垂哀祖母太后耄及卧病數載臣兢兢在疚情有足矜
不忍臣祖宗三百年宗社遽至殞絕曲賜裁處特與存
全大元皇帝再生之德則趙氏子孫世世皆賴不敢弭
忘臣無任感天望聖激切屏營之至已延既受降表玉
璽復遣囊嘉特以趙尹甫賈餘慶等還臨安召宰相出
議降事乙酉師次臨安北十五里囊嘉特洪模以總管
殷俊來報宋陳宜中張世傑蘓劉義劉師勇等挾益廣
二王出嘉會門渡浙江遁去惟太皇太后嗣君在宮已

延亟使諭阿嚙罕董文炳范文虎率諸軍先據守錢塘
口以勁兵五千人追陳宜中等過浙江不及而還丙戌
巴延下令禁軍士入城違者以軍法從事遣呂文煥齎
黃榜安諭臨安中外軍民俾按堵如故時宋三司衛兵
白晝殺人張世傑部曲尤橫閭里小民乘時剽殺令下
民大悅巴延又遣宣撫程鵬飛計議孫鼎亨囊嘉特洪
君祥入宮安諭太皇謝氏丁亥雲南行省賽音諤德齊
以改定雲南諸路名號來上又言雲南貿易與中州不

同鈔法實所未諳莫若以交會貳子公私通行爲便並從之戊子中書省臣言王孝忠等以罪命往巴達山採寶玉自効道經沙州值和和叛孝忠等自拔來歸令於瓜沙等處屯田從之大名路達嚕噶齊舒沁布坐姦賊伏誅沒其家宋主祖母謝氏遣其丞相吳堅文天祥樞密謝堂安撫賈餘慶中貴鄧惟善來見巴延於明因寺已延顧文天祥舉動不常疑有異志遂令萬戶孟古岱宣撫索多羈留軍中且以其降表不稱臣仍書宋號遣

程鵬飛洪君祥偕來使賈餘慶復往易之己丑軍次湖州市遣千戶囊嘉特省掾王祐齋傳國王璽赴闕敕高麗國以有官子弟為質中書省臣言賦民舊籍已有定額至元七年新括協濟合併戶為數凡二十萬五千一百八十敕減今歲絲賦之半庚寅已延建大將旗鼓率左右翼萬戶巡臨安城觀潮浙江於是宋宗室大臣以次來見暮還湖州市辛卯張宏範孟祺程鵬飛齋所易宋主稱臣降表至軍前甲午復薊州平谷縣立隨路都

轉運司仍詔諭諸處管民官以昂吉爾岱綽哈所部軍
五百戍哈達城卜奇台所部軍六百移戍建都其烏爾
圖托輝軍前在建都者並遣還翼穿濟州漕渠以真定
總管實保為中書右丞二月丁酉詔劉頡程德輝招淮
西制置使夏貴已亥克臨江軍庚子宋主焘率文武百
僚詣祥曦殿望闕上表乞為藩輔遣右丞相魚樞密使
賈餘慶樞密使謝堂端明殿學士簽樞密院事家鉉翁
端明殿學士同簽樞密院事劉已奉表以聞宋主祖母

太皇太后亦奉表及牋是日宋文武百司出臨安府詣
行中書省各以其職來見行省承制以臨安為兩浙大
都督府都督孟古岱范文虎入城視事辛丑巴延令張
惠阿魯罕董文炳左右司官石天麟楊晦等入城取軍
民錢穀之數閱實倉庫收百官誥命符印悉罷宋官府
散免侍衛禁軍宋主熈遣其右丞相賈餘慶等充祈請
使詣闕請命右丞相命吳堅文天祥同行行中書省右
丞相巴延等以宋主熈舉國內附具表稱賀兩浙路得

府八州六軍一縣八十一戶二百九十八萬三千六百七十二口五百六十九萬二千六百五十丁未詔諭臨安新附府州司縣官吏士民軍卒人等曰間者行中書省右丞相已延遣使來奏宋母后幼主暨諸大臣百官已於正月十八日齋醴綬奉表降附朕惟自古降王必有朝覲之禮已遣使特往迎致爾等各守職業其勿妄生疑畏凡歸附前犯罪悉從原免公私逋欠不得徵理應抗拒王師及逃亡嘯聚者並赦其罪百官有司諸王

郊第三學寺監祕省史館及禁衛諸司各宜安居所在
山林河泊除巨木花果外餘物權免徵稅祕書省圖書
太常寺祭器樂器法服樂工鹵簿儀衛宗正譜牒天文
地理圖冊凡典故文字并戶口版籍盡仰收拾前代聖
賢之後高尚儒醫僧道卜筮通曉天文厯數并山林隱
逸名士仰所在官司具以名聞名山大川寺觀廟宇并
前代名人遺迹不許拆毀鰥寡孤獨不能自存之人量
加贍給已延就遣宋內侍王堃入宮收宋國袞冕圭璧

符璽及宮中圖籍寶玩車輅輦乘鹵簿麾仗等物戊申
立浙東西宣慰司於臨安以戶部尚書麥歸祕書監焦
友直為宣慰使吏部侍郎楊居寬同知宣慰司事並兼
知臨安府事乙卯詔諭淮東制置使李庭芝淮西制置
使夏貴及所轄州軍縣鎮官吏軍民丁巳命焦友直括
宋祕書省禁書圖籍戊午祀先農東郊淮西制置夏貴
以淮西諸郡來降唯鎮巢軍復叛貴遣使招之守將洪
福殺其使貴親至城下福始降阿珠斬之軍中淮西路

得府二州六軍四縣三十四戶五十一萬三千八百二十七口一百二萬一千三百四十九庚申召已延偕宋君臣入朝辛酉車駕幸上都設資戒大會於順德府開元寺已延遣本布周青招泉州蒲壽庚壽晟兄弟甲子董文炳索多發宋隨朝文士劉褒然及三學諸生赴京師太學生徐應鑣父子四人同赴井死帝既平宋召宋諸將問曰爾等何降之易耶對曰宋有強臣賈似道擅國柄每優禮文士而獨輕武官臣等久積不平心離體

解所以望風而送款也帝命董文忠荅之曰借使似道
實輕汝曹特似道一人之過耳且汝主何負焉正如所
言則似道之輕汝也固宜三月丁卯命樞密副使張易
兼知祕書監事已延入臨安遣郎中孟祺籍宋太廟四
祖殿景靈宮禮樂器冊寶暨郊天儀仗及祕書省國子
監國史院學士院太常寺圖書祭器樂器等物戊辰括
江南已附州郡軍器甲戌阿珠遣使報廬州夏邑已降
文天祥自鎮江遁去追之勿獲荆湖南路行中書省言

潭州既定湖南州郡降者相繼即分命諸將鎮守其地
從之宋福王與芮自浙東至已延軍中以獨松關守將
張濡嘗殺奉使廉希賢斬之籍其家乙亥已延等發臨
安丁丑安塔哈阿嘍罕董文炳詣宋主宮趣宋主熈同
太后入觀郎中孟祺奉詔宣讀至免繫頸牽羊之語太
后全氏聞之泣謂宋主熈曰荷天子聖慈活汝當望關
拜謝宋主熈拜畢子母皆肩輿出宮唯太皇太后謝氏
以疾留戊寅敕諸路儒戶通文學者三千八百九十並

免其徭役其富實以儒戶避役者為民貧乏者五百戶
隸太常寺敕淮南廬州置總管萬戶將以中書右丞河
南等路宣慰使哈喇哈斯襄陽管軍萬戶邱浹並行府
事庚辰囊嘉特以宋王璽來上乙酉贛吉袁南安四郡
內附庚寅賜郡王卓多銀印敕上都和顧和買並依大
都例以中書右丞實保為戶部尚書閏月丙申置宣慰
司於濟寧路掌印造交鈔為給江南軍儲以前西夏中
興發行中書省事溫都爾濟遜大都路總管張守智並

為宣慰使東川行樞密院總使汪惟正略地涪州克山
寨谿洞凡十有三所丁酉詔湖廣阿爾哈雅呼圖克特
穆爾赴闕令托博和囉哈圖崔斌並留後鄂州辛亥命
副樞張易遣宋降臣吳堅夏貴等赴上都戊午淮西萬
戶府招降方山等六寨甲子禁西番僧持軍器以中書
省左右司郎中郝禎參知政事夏四月乙丑朔阿珠以
宋高郵寶應嘗餽餉揚州遣蒙古軍將哲辰及史弼等
守之別遣都元帥博囉罕等攻泰州之新城丁卯賜諸

王圖嚕金印戊辰以河南兵事未息開元路民饑並弛
正月五月屠殺之禁庚午敕南商貿易京師者毋禁辛
未行江西都元師宋都木達以應詔儒生醫卜士鄭夢
得等六人進敕隸祕書監丙子省東川行樞密院及成
都經略司以其事入西川行院復石人山寨居民於信
陽軍免大都醫戶去歲絲銀己卯以侍衛親軍征戍歲
久放令還家期六月各歸其軍庚辰以碩達勒達分地
歲輸皮革自今並入上都壬午召嗣漢天師張宗演赴

闕乙酉召昭文館大學士姚樞翰林學士王磐翰林侍
講學士圖克坦公履赴上都庚寅修太廟以北京行中
書省廉希憲為中書右承行中書省事於荊南府五月
乙未朔已延以宋主熈至上都制授熈開府儀同三司
檢校大司徒封瀛國公以平宋遣官告天地祖宗於上
都之近郊遣使代祀嶽瀆己亥已延請罷兩浙宣慰司
以孟古岱范文虎仍行兩浙大都督府事從之庚子定
度量壬寅宋三學生四十六人至京師癸卯復沂莒膠

密寧海五州所括民為防城軍者為民免其租徭二年
乙巳賜巴延所部有功將校銀二萬四千六百兩阿珠
遣總管陳傑攻拔泰州之新城遣萬戶烏瑪喇守之以
偏泰州丁未宗揚州都統姜才攻灣頭堡阿爾彬擊走
之殺其步騎四百人右衛親軍千戶董士元戰死戊申
宋馮都統等自真州率兵二千戰船百艘襲瓜洲阿珠
遣萬戶實喇罕阿都齊等出戰大敗之追至珠金沙得
船七十七艘馮都統等赴水死改博州為東昌路己酉

括獵戶鷹坊戶為兵乙卯靖州張州判及李信李發焚其城退保飛山新城行中書省發兵攻殺之徙其黨及家屬於大都宋江西制置黃萬石率其軍來附敕令入覲辛酉安西王相府請頒詔招合州張珏不從癸亥陞異樣局為總管府秩三品六月甲子朔敕新附三衛兵之老弱者放還其家己巳以孔子五十三世孫曲阜縣尹孔治兼權主祀事命東征元帥府選襄陽生券軍五百充侍衛軍置行戶部于大名府掌印造交鈔通江南

貿易庚午敕西京僧道伊囉勒昆達實密等有室家者
與民一體輸賦辛未命阿爾哈雅出征廣西請益兵選
軍三萬俾將之壬申罷兩浙大都督府立行尚書省於
鄂州臨安設諸路宣慰司以行省官為之並帶相銜具
立行省者不立宣慰司甲戌以大明厯浸差命太子贊
善王恂與江南日官置局更造新厯以樞密副使張易
董其事易恂奏今之厯家徒知厯術罕明厯理宜得者
儒如許衡者商訂詔衡赴京師宋揚州姜才夜率步騎

數千趨丁村堡守將史弼哲辰出戰斬首百餘級獲馬四十匹詰旦阿里都督陳巖以灣頭堡兵邀其後已延徹爾踵至所將皆阿珠麾下兵姜才軍遙望旗幟即走遂大破之獲米五千餘石阿珠又以宋高郵水路不通必由陸路餽運千戶額森呼圖克以千騎邀之數日米運果來殺負米卒數千獲米三千石戊寅詔作平金平宋錄及諸國臣服傳記仍命平章軍國重事耶律鑄監修國史戊子樞密院言陳宜中張世傑聚兵福建攻我

師江西都元帥宋都木達求援命以安慶蘄黃等郡兵
付宋都木達將之己丑宋都木達言福建魏天佑游義
榮棄家來附以天祐為管軍總管兼知邵武軍事義榮
遙授建寧路同知克管軍千戶壬辰下詔招諭宋揚州
制置李庭芝以次軍官及通泰真滁高郵大小官員又
詔諭陳宜中張世傑蘇劉義劉師勇等使降李庭芝留
朱煥守揚州與姜才率步騎五千東走阿珠親率百餘
騎馳去督右丞阿里萬戶劉國傑分道追及泰州西殺

步率千人庭芝等僅得入遂築長圍塹而守之阿珠獨當東南面斷其走路以戶部尚書張澍參知政事行中書省事于北京秋七月乙未行中書省左右司郎中孟祺以亡宋金玉寶及牌印來上命太府監收之丙申淮安寶應民流寓邳州者萬餘口聽還其家丁酉宋涪州觀察陽立于嗣榮請降詔招諭其父從之戊戌陞閬州為保寧府敕山丹城直隸省部以達魯噶齊希扎仍領之壬寅以李庭出征賞其部將李承慶等鈔馬衣服甲

仗有差乙巳朱煥以揚州降丁未詔諭廣西路靜江府
等大小州城官吏使降甲寅賜諸王博囉印以楊村至
灣雞泊漕渠洄遠改從孫家務乙卯宋泰州守將孫良
臣與李庭芝帳下卒劉發鄭俊開北門以降執李庭芝
姜才繫揚州獄丙辰阿珠以總管烏瑪喇等守泰州其
通滁高郵等處相繼來附淮東路得州十六縣三十三
戶五十四萬二千六百二十四口一百八萬三千二百
十七遣使持香幣祠嶽瀆后土以中書右丞阿爾哈雅

為平章政事簽書樞密院事淮東行樞密院拜奇貞勒
密實為中書右丞參知政事董文炳為中書左丞淮東
左副都元帥達春兩浙大都督范文虎江東江西大都
督知江州呂文夔淮東淮西左副都元帥陳巖並參知
政事八月己巳穿武清蒙村漕渠敕漢軍都元帥庫庫
岱李庭將侍衛軍二千人西征陞潯陰縣為潯州乙亥
斬宋淮東制置使李庭芝都統姜才于揚州市庚辰罷
襄陽統軍司車駕至自上都遣太常卿托果斯以銅爵

一豆二獻于太廟以四萬戶總管鄂囉齊參知政事九月壬辰朔命國師琳沁作佛事于太廟己亥享于太廟常饌外益野豕鹿羊蒲萄酒庚子命姚樞王磐選宋三學生之有實學者留於京師餘聽還家辛丑遣瀘州屯田軍四千轉漕重慶癸卯以平宋赦天下乙巳高麗國王王湛上參議中贊金方慶功授虎符丙午敕常德府歲貢包茅丁未諭西川行樞密院移檄重慶俾內附命有司隲沿淮城壘辛亥太白犯南斗甲寅太白入南斗

乙卯以吐番哈達城為寧遠府辛酉召宋宗臣鄂州教
授趙與票赴闕設資戒會於京師阿珠入覲江淮及浙
東西湖南北等路得府三十七州一百二十八關一監
一縣七百三十三戶九百三十七萬四百七十二口千
九百七十二萬一千一十五冬十月甲子以陳巖拔新
城丁村功賜金五十兩部將劉忠等賜銀有差乙亥賜
皇子北平王出征軍士貧乏者羊馬幣帛有差申明以
良為娼之禁丁亥兩浙宣撫使焦友直以臨安經籍圖

畫陰陽祕書來上戊子淮西安撫使夏貴請入覲乞令其孫貽孫權領宣撫司事從之以淮東左副都元帥阿里為平章政事河南等路宣慰使哈喇哈斯為中書右丞兵部尚書王儀吏部尚書兼臨安府安撫使楊鎮河南河北道提刑按察使密里呼忻並參知政事參知政事陳巖行中書省事於淮東十一月癸巳安西王所部軍克萬州丙午賜阿珠所部有功將士二百三十九人各銀二百五十兩西川行院呼敦言所部軍士久圍重

慶逃亡者衆乞益軍一萬并降詔招誘逋民之在大良
平者並從之壬子賜婁達袞軍有功及死事者銀鈔有
差癸丑併省內外諸司乙卯太陰犯填星庚申敕管民
及理財之官由中書銓調軍官由樞密院定議蘧襄漢
荆湖諸城南平招撫使兼知峽州事趙真請降詔招諭
夔州安撫張起巖從之高麗國王王愷遣其臣判祕書
寺朱悅來告更名晞十二月辛酉朔熒惑掩鉤鈴以十
四年厯賜高麗丁卯改雲南羅葡甸為元江府路辛未

賜塔海所部戰士及死事者銀鈔有差賜呼巴里等戰功十九人銀千二百兩壬申李思敬告運使姜毅所言悖妄指毅妻子為證帝曰妻子豈為證者耶詔勿問乙亥定江南所設官府辛巳以軍士圍守崇慶勞苦使鈔六千定庚寅詔諭浙東西江東西淮東西湖南北府州軍縣官吏軍民昔以萬戶千戶漁奪其民致令逃散今悉以人民歸之元籍州縣凡管軍將校及宋官吏有以勢力奪民田廬產業者俾各歸其主無主則以給附近

人民之無生產者其田租商稅茶鹽酒醋金銀鐵冶竹
貨湖泊課程從實辦之凡故宋繁冗科差聖節上供經
總制錢等百有餘件悉除免之巴延言張惠守宋府庫
不俟命擅啟管鑰詔阿珠詰其事仍諭江之東西浙之
東西淮之東西官吏等檢覈新舊錢穀除浙西浙東江
西江東湖北五道宣慰使陞江淩為上路瑞安府仍為
溫州隴州為散府薊州復置豐潤縣陞臨洮渭源堡為
縣賜諸王金銀幣帛如歲例賜諸王奈曼岱等羊馬價

賞阿珠等戰功及賜降臣吳堅夏貴等銀鈔幣帛各有
差賜巴延阿珠等青鼠銀鼠黃袖濟遜衣餘功臣賜豹
裘獐裘及皮衣帽各有差是歲東平濟南泰安德州連
海清河平灤西京西三州以水旱缺食賑軍民站戶米
二十二萬五千五百六十石粟四萬七千七百十二石
鈔四千二百八十二錠有奇平陽路旱濟寧路及高麗
瀋州水並免今年田租斷死罪三十四人

十四年春正月癸巳行都元帥府軍次廣東知循州劉

興以城降丙申以江南平百姓疲於供軍免諸路今歲
所納絲銀賜嗣漢天師張宗演演道靈應冲和真人領
江南諸路道教戊戌高麗金方慶等為亂命高麗王治
之仍命實都洪察球爾飭兵禦備癸卯復立諸道提刑
按察司甲辰命阿珠選銳軍萬人赴闕丁未知梅州錢
崇之以城降戊申賜三衛軍士貧乏者八千三百五十
二人各鈔二錠幣十匹己酉賜耶律禱鈔千錠甲寅敕
宋福王趙與芮家貲之在杭越者有司輦至京師付其

家丙辰立建都羅羅斯四路守戍鄂摩等處並置官屬
己未以白玉碧玉水晶爵六獻於太廟括上都隆興北
京西京四路獵戶二千為兵置江淮等路諸轉運鹽使
司及江淮權茶都轉運使司命嗣漢天師張宗演修周
天醮於長春宮宗演還江南以其弟子張留孫留京師
二月辛酉命征東都元帥洪察球爾將兵二千赴上都
壬戌瑞州安撫姚文龍率張文顯來降家屬為宋人所
害賜文龍文顯等鈔有差癸亥彗星出東北長四尺餘

甲子遣使代祀嶽瀆后土丙寅改安西王傳銅印為銀
印立永昌路山丹城等驛仍給鈔千錠為本俾取息以
給驛傳之須諸王哲伯特穆爾言永昌路驛百二十戶
疲於供給質妻孥以應役詔賜鈔百八十錠贖還之丁
卯荆湖北道宣慰使塔哈拔歸州山寨四十七戌辰祀
先農于東郊甲戌西川行院布哈率衆數萬至重慶營
浮屠闢造梯衝將攻之其夜都統趙安以城降張珏舣
舡江中與其妻妾順流走涪州元帥張德潤以舟師邀

之珏遂降車駕韋上都辛巳命北京選福珠所統軍三百赴上都壬午曠吉撫二州城隆興濱西江姑存之仍選汀州軍馬守禦瑞金縣丙戌連州守過元龍已降復叛塔海將兵討之元龍遁丁亥知南恩州陳堯道僉判林叔虎以城降詔以僧康戩琳沁嘉噶爾幹並為江南總攝掌釋放除僧租賦禁擾寺宇者以大司農御史大夫宣慰使兼領侍儀司事博囉為樞密副使兼宣徽使領侍儀司事三月庚寅朔以冬無雨雪春澤未繼遣使

問便民之事於翰林國史院耶律鑄姚樞王磐竇默等
對曰足食之道唯節浮費靡穀之多無踰醪醴麴蘖况
自周漢以來嘗有明禁祈賽神社費亦不資宜一切
禁止從之辛卯湖廣行中書省言廣西二十四郡並內
附議復行中書省于潭州置廣南西路宣撫司於靜
江詔鄭鼎所將侍衛萬人還京師崔斌阿爾哈雅同
駐靜江呼圖克特穆爾鄭鼎同駐鄂漢賈居貞北博和
囉哈圖同駐潭州癸巳以行都水監兼行漕運司事甲

午以鄭鼎所部軍士撫定靜江之勞命還家少休期六月赴上都乙未福建漳泉二郡蒲壽庚印德傳李珣李公度皆以城降丁酉括馬三萬二千二百六匹孕駒者還其主壬寅廣東肇慶府新封等州皆來降癸卯壽昌府張之綱以從叛棄市乙巳命中外軍民官所佩金銀符以色組繫於肩腋庶無褻瀆具為令庚戌建寧府通判郭纘以城降黃州歸附官吏勝入覲以所部將校于躍等三十一人戰功聞命官之發書東西川行樞密院

事答順言比遣同知隆州事趙孟煇齎詔招諭南平軍都掌蠻羅計蠻及鳳凰中壠羅韋高崖等四砦皆降田楊二家承驚夷民亦各遣使納款壬子實應軍人施福殺其守將降于淮東都元帥府詔以福為千戶佩金符癸丑命汪惟正自東川移鎮鞏昌行中書省依制以閩浙溫處台福泉汀漳劍建寧邵武興化等郡降官各治其郡潭州行省遣使上言廣南西路慶遠鬱林昭賀藤梧融賓邕象峯廉容貴潯皆降得府一州十四

復立襄陽府襄陽縣平章政事浙西道宣慰使安塔哈
為平章政事行中書省事於江淮郡王哈達為平章
政事行中書省事於北京夏四月甲子宋特磨道將軍農
士貴知安平州李惟屏知來安州岑從毅等以所屬州縣溪
洞百四十七戶二十五萬六千來附癸酉省各路轉運司
事入總管府設鹽轉運司四置榷場於碭門黎州與吐
蕃貿易丙子召安撫趙與可宣撫陳巖入覲丙戌禁江
南行用銅錢均州復立南漳縣五月癸巳申嚴大都酒

禁犯者籍家資散之貧民辛丑千戶哈喇哈斯死於瑛
塔噶之戰命其子呼圖克岱爾襲職癸卯改廣南西路
宣撫司為宣慰司廣西欽橫二州改立安撫司各道提
刑按察司兼勸農事敕江南歸附官三品以上者遣質
子一人入侍西番長阿里鼎寧濟等三十一族來附得
戶四萬七百丙子融州安撫使譚昌謀為不軌伏誅辛
亥以河南山東水旱除河泊課聽民自漁乙卯選蒙古
漢軍相叅宿衛詔諭思州安撫使田景賢又詔諭瀘州

西南番蠻王阿永筠連騰串等處諸族蠻夷使其來附
命真人李德和代祀濟瀆六月丙寅涪州安撫陽立及
其子嗣榮相繼來附命立為夔路安撫使嗣榮為管軍
總管並佩虎符仍賜鈔百錠壬申賞征廣戰死之家銀
各五十兩丁丑置尚膳院秩三品以提點尚食尚藥局
呼魯蘇為尚膳使其屬司有七庚辰賞陽立所部戰士
鈔千錠甲申荆湖北道宣慰使赫德得諜者言夔府將
出兵攻荆南諭陽立等與塔海會兵禦之丁亥陞崇明

沙為崇明州以行省參政行江東道宣慰使阿嚙罕為
中書左丞行江東道宣慰使湖北道宣慰使鄂囉齊
參知政事行湖北道宣慰使秋七月戊子朔罷大名濟寧
印鈔局壬辰敕犯盜者皆棄市符寶郎董文忠言盜有
強竊賊有多寡似難悉寘于法帝然其言遽命止之丁
酉敕自今非佩符使臣及軍情急速不聽乘傳戊戌申
禁羊馬羣之在北者八月內毋縱出北口諸隘踐食京
畿之禾犯者沒其畜癸卯諸王錫里濟剌北平王于阿

里瑪圖之地械繫右丞相安圖誘脅諸王以叛使通好
于海都海都弗納東道諸王亦弗從遂率西道諸王至
和林城北詔右丞相巴延帥軍往禦之諸王呼嚕岱率
其屬來歸與右丞相巴延等軍合丙午置行御史臺于
揚州以都元帥姜衛為御史大夫置八道提刑按察司
戊申東川都元帥張德潤等攻涪州大敗之擒安撫
程聰程廣置行中書省于江西以參知政事行江西宣
慰使達春為右丞參知政事行江西宣慰使敏珠爾丹

為左丞淮東宣慰使徹爾特穆爾江東宣慰使張崇實江
西宣慰使李恒招討使頁特密實萬戶實勒們荆湖路
宣撫使程鵬飛閩廣大都督兵馬招討使蒲壽庚並參
知政事行江西省事壬子權大都商稅丁巳湖北宣慰
司調兵攻司空山復壽昌黃州二郡賜平宋將帥軍士
及簡川軍士廣西死事者銀鈔各有差回水窩淵聖廣
源王加封善佑常山靈濟昭應王加封廣惠安丘電泉
靈霈侯追封靈霈公以參知政事行江東道宣慰使呂

文煥為中書左丞八月戊午朔詔布哈行院西川丁邠
成都路倉收羨餘五千石按察司已治其罪命以其米
就給西川兵辛未常德府總管魯希文與李三俊結構
為亂事覺命行省誅之車駕畋于上都之北九月壬申
製鑕鐵海青圓符丙申廣南東路廣連韶德慶惠潮南
雄英德等郡皆內附甲辰福建行省以宋二王在其疆
境調都督蓋古岱招討高興領兵討之昂吉爾實都唐
古特等引兵攻司空山寨破之殺張德興執其三子以

歸壬子福建路宣慰使行征南都元帥索多遣招討使
伯嘉努丁廣取建寧之崇安等縣及南劍州冬十月丙
辰朔日有食之己未享於太廟庚申湖北宣慰使塔爾
海略地至夔府太原坪禽其將誅之辛酉弛蓋州獵禁
乙亥以宋張世傑文天祥猶未降命安塔哈選銳兵防
遏隆興諸城禁無籍軍隨大軍剽剽者勿過關渡己卯
降臣郭曉魏象祖入覲賜幣帛有差壬午置宣慰司于
黃州甲申播州安撫使楊邦憲言本族自唐至宋世守

此土將五百年昨奉旨許仍舊乞降璽書從之以行省
參政呼圖克特穆爾托博和囉哈圖崔斌並為中書左
丞鄂州總管府達魯噶齊張鼎湖北道宣慰使賈居貞
並參知政事十一月戊子樞密院臣言宋文天祥與其
徒趙孟潛同起兵行中書發兵攻之殺孟潛天祥僅以
身免詔以其妻孥赴京師右副都元帥張德潤上涪州
功賜鈔千錠乙未凡偽造寶鈔同情者並處死分用者
減死杖之具為令庚子令中書省擬諭中外江南既平

宋宜曰亡宋行在宜曰杭州以吏部尚書巴圖爾丹參
知政事十二月丙辰置中灤唐村淇門驛丁卯以大都
物價翔踊發官廩萬石賑糶貧民庚午梁山軍袁世安
以其城及金石城軍民來降壬申潭州行省復祈陽縣
斬首賊羅飛餘黨悉平乙亥都元帥楊文安攻咸淳府
克之以十五年歷日賜高麗國以參議中書省事耿仁
參和政事冠州及永年縣水免今年田租蕪任河復民
田三千餘頃賜諸王金銀幣帛等如歲例賜諸王額布

根雅克特穆爾等五百二十九人羊馬價鈔八千四百
五十二錠賞拜達勒等千三百五十五人戰功金百兩
銀萬五千一百兩鈔百三十錠及納奇實金素幣帛貂
鼠豹裘衣帽有差是歲賑東平濟南等郡饑民米二萬
一千六百十七石粟二萬八千六百十三石鈔萬一百
十二錠斷死罪三十二人

元史卷九

元史本紀卷九考證

至元十三年二月庚子宋文武百司各以其職來見

案原本脫來見二字今據明南監本增

七月丁酉陽立子榮請招諭其父 案陽字原本訛揚

今據宋史改

九月辛丑遣瀘州屯田軍轉漕重慶 案瀘州刻本訛

廬今據地理志及明南監本改

十一月乙卯太陰犯填星 案乙卯原本訛丁卯今據

前後干支及天文志改

十二月辛酉朔

案辛酉原本訛辛卯考天文志及宋

史益廣二王傳俱作辛酉與前後干支合今據改

十四年二月丁亥禁擾寺宇者

案原本禁訛禁今據

明南監本改

六月壬申賞征廣戰死之家銀各五十兩 案原本作

壬寅今據前後干支改

七月戊申東川都元帥張德潤攻涪州 案德潤原本

訛得潤今據前後卷及明南監本改

欽定四庫全書

元史卷十

明翰林學士亞中大夫知制誥兼修國史宋濂等修

本紀

世祖七

十五年春正月辛卯阿喇卜丹將兵戍鄂端給米三千石鈔三十錠以千戶鄭鄴有戰功陞萬戶佩虎符癸巳西京饑發粟萬石賑之仍諭阿哈瑪特廣貯積以備闕

乏順德府總管張文煥太原府達嚕噶齊台哈布哈以
按察司發其姦賊遣人詣省自首反以罪誣按察司御
史臺奏按察司設果有罪不應因事而告宜待文煥等
事決方聽其訴從之己亥收括木伊克官額森庫庫岱
等坐易官馬拉木伊克人畜免其罪以管民官兼領其
事官吏隱匿及擅易馬匹私配婦人者沒其家禁官吏
軍民賣所娶江南良家子女及為娼者賣買者兩罪之
官沒其直人復為良賜湖州長興縣金沙泉名為瑞應

泉金沙泉不常出唐時用此水造紫筍茶進貢有司具
牲弊祭之始得水事訖輒涸宋末屢加浚治泉迄不出
至是中書省遣官致祭一夕水溢可溉田千畝安撫司
以聞故賜令名封磁州神崔府君為齊聖廣佑王壬寅
弛女直碩達勒達酒禁丙午安西王相府言萬戶圖們
岱爾郝扎拉布哈等攻克瀘州斬其將王世昌李都統
戊申從阿哈瑪特請自令御史臺非白于省毋擅召倉
庫吏亦毋究錢穀數及集議中書不至者罪之授宋福

王趙與芮金紫光祿大夫檢校大司農平原郡公庚戌
東川副都元師張德潤大敗涪州兵斬州將王明及其
子忠訓總轄韓文廣張遇春詔軍官不能撫治軍士及
役擾致逃亡者沒家貲之半以阿爾尼格為大司徒兼
領將作院二月戊午祀先農蒙古胄子代耕籍田癸亥
咸淳府等郡及良平民戶饑以鈔千錠賑之命平章政
事安塔哈阿里選擇江南廉能之官去其冗員與不勝
任者復立河中府萬泉縣辛未以川蜀地多嵐瘴弛酒

禁丁丑熒惑犯天街庚辰征巴實伯里軍士免其徭役
壬午參知政事福建路宣慰使索多率師攻潮州破之
置太史院命太子贊善王恂掌院事工部郎中郭守敬副
之集賢大學士兼國子祭酒許衡領焉改華亭縣為松
江府遣使代祀嶽瀆以參知政事夏貴范文虎陳巖並
為中書左丞黃州路宣慰使唐古特史弼並參知政事
三月乙酉詔蒙古岱索多蒲壽庚行中書省事于福
州鎮撫瀕海諸郡以沿海經略副使哈喇岱領舟師南

征陞經略使兼左副都元帥佩虎符丁亥太陰犯太白
戊子太陰犯熒惑己丑行中書省請考覈行御史臺文
卷不從甲午西川行樞密院招降西蜀重慶等處得府
三州六軍一監一縣二十柵四十蠻夷一乙未宋廣王
昺遣倪堅以表來上令俟命大都命揚州行省選特木爾
布哈所部兵助隆興進討丁酉命塔爾海毀夔府城戊
戌劉宗純據德慶府梧州萬戶朱國寶攻之焚其寨柵遂
拔德慶詔中書左丞呂文煥遣官招宋生熟峯軍堪為

軍者月給錢糧不堪者給牛屯田庚子漢軍都元帥李
庭自願將兵擊張世傑從之西川行樞密院招宜勝土
恢等城及石榴寨相繼來降壬寅以諸路歲比不登免
今年田租絲銀癸卯都元帥楊文安遣兵攻克紹慶執
其郡守解龍命斬之乙巳廣南西道宣慰司遣管軍總
管崔永千戶劉潭王德用招降雷化高三州即以永等
鎮守之宋張世傑蘇劉義挾廣王昺奔碭洲參知政事
密里呼忻張守智並行大司農司事夏四月乙卯命元

帥劉國傑將萬人北征賜將士鈔二萬六百七十一錠
修會川縣盤古王祠祀之丙辰詔以雲南境土曠遠未
降者多簽軍萬人進討戊午以江南土寇竊發人心未
安命中書省左丞夏貴等分道撫治軍民檢覈錢穀
察郡縣被旱災甚者吏廉能者舉以聞其貪殘不勝任
者劾罷之甲子命布哈留鎮西川汪惟正率獲功蒙古
漢軍官及降臣入覲大都巡軍之戌西川者遣還立雲
南湖南二轉運司以雨露足稍弛酒禁民之哀疾飲藥

者官為醞釀量給之辛未置光祿寺以同知宣徽院事
推勅特穆爾為光祿卿廣州張鎮孫叛犯廣州守將張
雄飛棄城走出兵臨之鎮孫乞降命遣鎮孫及其妻赴
京師丁丑雲南行省招降臨安白衣和泥分地城寨一百
九所威楚金齒落落分地城寨軍民三萬三千二百禿
老蠻高州筠連州等城寨十九所庚辰以許衡言遣使
至杭州等處取在官書籍版刻至京師壬午立行中書
省于建康府中書左丞崔斌言此以江南官冗委任非

人命阿里等沙汰而阿哈瑪特溺於私愛一門子弟並為要官詔並黜之又言阿喇卜丹臺臣劾其侵欺官錢事猶未竟今復授江淮參政不可詔止其行敕自今罷免之官宰執為宣慰宣慰為路官路官為州官淮浙鹽課直隸行省宣慰司官勿預改北京行省為宣慰司追江南工匠官虎符五月癸未朔詔諭翰林學士和果斯今後進用宰執及主兵重臣其與儒臣老者同議乙酉行中書言近討卽武建昌吉撫等巖洞山寨獲聶大老

戴與子餘黨皆下獨張世傑據碭洲攻傍郡未易平擬
遣宣慰使史格進討詔以伊蘇哈雅總制之救主兵官
若已擢授其舊職宜別授有功者勿復以子孫承襲申
嚴無籍軍虜掠及傭奴代軍之禁甲午諸職官犯罪受
宣者聞奏受救者從行臺處之受省札者按察司治之
其宣慰司官吏姦邪非違及文移案牘從本道提刑按
察司磨刷應有死罪有司勘問明白提刑按察司審覆
無寃依例結案類奏待命自行中書以下應行公務

小事限七日中事十五日大事三十日選江南銳軍為
待衛親軍乙未以烏蒙路隸雲南行省仍詔諭烏蒙路
總管阿穆立站驛修道路其一應事務並聽行省平章
賽音諤德齊節制立川蜀水驛自敘州達荆南府己亥江
東道按察使阿巴齊求江東宣慰使呂文煥金銀器皿
及宅舍子女不獲誣其私匿兵仗詔行臺大夫美衛詰
之事白免阿巴齊官辛亥制授張留孫江南諸路道教
都提點賜供衛司官及其所部四百五十人鈔二千六

十錠六月乙卯改西蕃李唐城為李唐州庚申敕博囉
齊達喇齊及司糧司幣等官並勿授符已授者收之壬
戌賜瀘州降臣薛旺等鈔有差丙寅以江南防拓闕隘
一十三所設官太冗選軍民官廉能者各一人分領陞
濟南府為濟南路降西涼府為西涼州丁卯置甘州和
羅提舉司以備給軍餉賑貧民甲戌詔汰江南冗官江
南元設淮東湖南隆興福建四省以隆興併入福建其
宣慰司十一道除額設員數外餘並罷去仍削去各官

舊帶相銜罷茶運司及營田司以其事隸本道宣慰司
罷漕運司以其事隸行中書省各路總管府依驗戶數
多寡以上中下三等設官宋故官應入仕者付吏部錄
用以史塔爾琿唐古特驟陞執政孟古岱任無為軍達
魯噶齊復遙領黃州宣慰使並罷之時淮西宣慰使昂
吉爾入覲言江南官吏太冗故有是命帝諭昂吉爾曰
宰相明天道察地理盡人事能兼此三者乃為稱職爾
縱有功宰相非可覲回回人中阿哈瑪特才任宰相阿

里年少亦精敏南人如呂文煥范文虎率衆來歸或可
以相位處之又顧謂左右曰汝可諭姚樞等江南官吏
太冗此卿輩所知而皆未嘗言昂吉爾乃為朕言之近
侍劉特穆爾因言阿爾哈雅屬吏張鼎今亦叅知政事
詔即罷去遂命平章政事赫伯等諭中書省樞密院御
史臺翰林院及諸南儒令為宰相宣慰及各路達魯噶
齊佩虎符者俱多謬濫其議所以減汰之者凡小大政
事順民之心所欲者行之所不欲者罷之乙亥救省院

臺司應聞奏事必由起居注丁丑太廟殿柱朽命太常少卿拜穆蘇告于太室乃易之戊寅全州西延溪洞徭蠻二十所內附已卯發蒙古軍千人從江東宣慰使張弘範由海道討宋餘衆叅知政事孟古岱請頒詔招宋廣王昺及張世傑等不從庚辰處州張三八章炎季文龍等為亂行省遣宣慰伊之哩率兵討之辛巳達實多收括中興等拉木伊克安南國王陳光昞遣使來貢秋七月壬午朔湖南制置張烈良提刑劉應龍與周龍賀

十二起兵行省調兵往討獲周隆賀十二斬之烈良等
舉家及餘兵奔思州烏羅洞為官軍所襲二人皆死甲
申賜親王阿雅噶齊所部建都戍軍貧乏者鈔千二百
七十七錠行御史臺增設監察御史四員江南湖北道
嶺南廣西道福建廣東道並增設提刑按察司乙酉江
南諸路總管府為散府者七為州者一散府為州者二
丙戌以江南事繁行省官未有知書者恐於吏治非便
分命崔斌至揚州行省張守智至潭州行省丁亥詔虎

符舊用輝和爾字令易以國字癸巳以塔海征夔軍旅
之選戍者及揚州江西舟師悉付水軍萬戶張榮實將
之守江口丙申以右丞達春呂師夔叅知政事賈居貞
行中書省事于贛州福建江西廣東皆隸焉丁酉賜江
西軍與張世傑力戰者三十人各銀五十兩以江西叅
知政事李恒為都元帥將蒙古漢軍征廣命揚州行中
書省分軍三千付李恒復上都守城軍二千人為民壬
寅改鑄高麗王王懋駙馬印丙午改開元宣撫司為宣

慰司太倉為御廩資成庫為尚用監皮貨局入總管府
定江南俸祿職田戊申濮州蝗已酉禁使人經行納琳
驛辛亥改京兆府為安西府詔江南浙西等處毋非理
征科擾民建漢祖天師正一祠於京城以叅知政事李
恒為蒙古漢軍都元帥孟古岱為福建路宣慰使張榮
實張鼎並為湖北道宣慰使頁特密實為招討使八月
壬子朔追毀宋故官所受告身以嘉定重慶夔府既平
還侍衛親軍歸本司遣禮部尚書柴椿等使安南國詔

切責之仍俾其來朝丁巳沿海經略司行左副都元帥
劉深言福州安撫使王積翁既已降附復通謀於張世
傑積翁上言兵力單弱若不暫從恐為閩郡生靈之患
詔原其罪壬戌有首高興匿宋金者詔置勿問兩淮運
糧五萬石賑泉州軍民乙丑濟南總管張宏以代輸民
賦嘗貸阿里阿都齊等銀五百五十錠不能償詔依例
停徵辛未復給漳州安撫使沈世隆家貲世隆前守建
寧府有郭贊者受張世傑檄誘世隆世隆執贊斬之孟

古岱以世隆擅殺籍其家帝曰世隆何罪其還之仍授
本路管民總管中書省臣言近有旨追諸路管民官所
授金虎符其江南路臣宜仍所授從之制封泉州神女
號護國明著靈惠協正善慶顯濟天妃甲戌安西王相
府言川蜀悉平城邑山寨洞穴凡八十三其渠州禮義
城等處凡三十三所宜以兵鎮守餘悉徹毀從之己卯
初立提刑按察司于輝和爾分地庚辰以四川平勞賞
軍士鈔二萬一千三百三十九錠辛巳陞名磁為廣平府

路監察御史韓昺劾同知大都路總管府事錫喇卜丹
毆部民至死詔杖之免其官仍籍沒家貲十之二詔行
中書省索多蒲壽庚等曰諸蕃國列居東南島嶼者皆
有慕義之心可因蕃舶諸人宣布朕意誠能來朝朕將
寵禮之其往來互市各從所欲詔諭軍前及行省以下
官吏撫治百姓務農樂業軍民官毋得占據民產抑良為
奴以中書左丞董文炳簽書樞密院事叅知政事索多
蒲壽庚並為中書左丞九月壬午朔敕以總管張子良

所簽軍二千二百人為侍衛軍俾張亨陳瑾領之癸未
省東西川行樞密院其成都潼川重慶利州四處皆設
宣慰司詔分揀諸路所括軍驗事力乏絕者為民其恃
權豪避役者復為兵所遣分揀官及本府州縣官能核
正無枉者陞爵一級又減至元九年所括三萬軍半以
為民其商戶餘丁軍並除之戊子以征東元帥府治東
京庚寅昭信達魯噶齊李海拉蘇言願同張弘畧取宋
二王調漢軍水軍俾將之以中書左丞行江東道宣慰

呂文煥為中書右丞冬十月己未享于太廟常設牢醴
外益以羊鹿豕蒲萄酒庚申車駕至上都辛酉賑已
實伯里實勒和斯等饑民鈔二千五百錠分發府漢軍
二千新軍一千付塔海將之賜哈達奇爾台軍士馬價
契帛二千匹其力戰者賞賚有差乙丑正乙祠成詔張
留孫居之丁卯弛山場樵採之禁己巳趣行省造海船
付烏瑪喇張弘範增兵四千俾將之庚午敕御史臺凡
軍官私役軍士者視數多寡定其罪詔河西西京南京

西川北京等處宣慰司案牘宜依江南近例令按察司
磨照移河南河北道提刑按察司治南京御史臺臣言
實里巴之弟阿拉與王權府等俘掠良民實里巴縱弗
問及遣御史掾詰問不伏詔執而鞠之十一月庚辰朔
棗陽萬戶府言李均收撫大洪山寨為宋朱統制所害
命賜銀千兩賙其家丁亥以辰沅靖鎮遠等郡地接蠻
獠民不安業命塔海程鵬飛並為荆湖北道宣慰使置
司常德路餘官屬留荆南府供給糧食軍需壬辰江東

道宣慰使囊嘉特言江南既平兵民宜各置官屬蒙古軍宜分屯大河南北以餘丁編立部伍絕其虜掠之患分揀官僚本以草阿哈瑪特濫設之弊其將校立功者例行沙汰何以勸後新附軍士宜令行省賜衣糧無使闕乏帝嘉納之徵宋相馬廷鸞章鑑赴闕甲午開酒禁復阿哈瑪特子呼遜阿縹縹等官始呼遜等以崔斌論列免至是以張惠請復之惠又請復其子巴蘇呼及其姪巴圖爾丹沙木斯鼎前職帝疑惠不從敕已除官僚

不之任者除名為農丁酉召陳巖入覲己亥貸侍衛軍
屯田者鈔二千錠市牛具辛丑建寧政和縣人黃華集
鹽夫聯絡建寧括蒼及畬民婦自稱許夫人為亂詔調
兵討之丁未行中書省自揚州移治杭州立淮東宣慰
司于揚州以阿噠罕為宣慰使詔諭沿海官司通日本
國人市舶以叅知政事程鵬飛行荆湖北道宣慰使閏
月庚戌朔羅氏鬼國主阿朶西南蕃主韋昌盛並內附
詔阿朶韋昌盛各為其地安撫使佩虎符辛亥太白熒

感填星聚于房甲寅辛光祿寺丙辰詔圖嚕齊同潭州
行省官一員察戍還病軍所過州縣不加顧恤者按之
甲子發蒙古漢軍都元帥張弘範攻漳州得山寨百五
十戶百萬一是日諜報文天祥見屯潮陽港亟遣先鋒
張弘正總管囊嘉特率輕騎五百人追及于五坡嶺麓
中大敗之斬首七千餘執文天祥及將校四人赴都十
二月己卯朔簽書四川行樞密院答順招誘都掌蠻夷
及其屬百一十人內附以其長阿永為西南番蠻安撫

使得蘭紐為都掌蠻安撫使賜虎符餘授宣敕金銀符
有差庚辰思州安撫使田景賢播州安撫使楊邦憲請
歸宋舊借鎮遠黃平二城仍撤戍卒不允景賢等請降
詔禁戍卒毋擾思播之民從之鴨池等處招討使竒徹
所領南征新軍不能自贍者千人命屯田于京兆乙酉
巴延以渡江收撫沙陽新城陽羅堡閩浙等郡獲功軍
士及降臣姓名來上詔授虎符者入覲千戶以下並從
行省授官丙戌揚州行省上將校軍功凡百三十四人

授官有差丙申從播州安撫楊邦憲請以鼎山仍隸播
州庚子敕長春宮修金錄大醮七晝夜丙午禁玉泉山
樵採漁弋戊申以叙州等處禿老蠻殺使臣撒里蠻命
發兵討之封伯夷為昭義清惠公叔齊為崇讓仁惠公
以十六年厯日賜高麗海州贛榆縣雹傷稼免今年田
租南寧吉瑞萬安三郡內附開城置屯田總管府廣安
州隸之臨淄臨朐清河復為縣導肥河入于鄆淤陂盡
為良田會諸王于大都以平宋所俘寶玉器幣分賜

之賜諸王等金銀幣帛如歲例是歲西京奉聖州及彰德等處水旱民饑賑米八萬八百九十石粟三萬六千四十石鈔二萬四千八百八十錠有奇斷死罪五十二人

十六年春正月己酉朔高麗國王王愷遣其簽議中贊金方慶來賀兼奉歲幣壬子罷五翼特默齊重役軍癸丑汪良臣言西川軍官父死子繼勤勞四十年乞顯加爵秩詔從其請詔以海南瓊崖儋萬諸郡俱平令阿爾

哈雅入覲瀘州降臣趙金吳大才袁禹繩等從征重慶
其家屬為叛者所殺詔賜鈔有差仍以叛者妻孥付金
等救高麗國置大灰父州東京柳石字落四驛甲寅無
籍軍侵掠平民而諸王哲伯特穆爾所部為暴尤甚命
捕為首者寘之法救移贛州行省還隆興高麗國來獻
方物辛酉合州安撫使王立以城降先是立遣間使降
安西王相李德輝東川行院與德輝爭功德輝單舸至
城下呼立出降川蜀以平東川行院遂言立久抗王師

嘗指斥憲宗宜殺之樞密院以其事聞而降臣李諒亦
訟立前殺其妻子有其財物遂詔殺立籍其家貨償諒
既而安西王具立降附本未來上且言東川院臣憤李
德輝受降之故誣奏誅立樞密院臣亦以前奏為非帝
怒曰卿視人命若戲耶前遣使計殺立久矣今追悔何
及卿等妄殺人其婦待罪斥出之會安西王使再至言
未殺立即召立入覲命為潼川路安撫使知合州事士
成分川蜀為四道以成都等路為四川西道廣元等路

為四川北道重慶等路為四川南道順慶等路為四川東道並立宣慰司賞重慶等處從征蒙古漢人軍鈔三萬九千九百五十一錠改播州昂山縣為播川縣丁卯賜叅知政事咎順田民百八十戶於江津縣戊辰立河西屯田給畊具遣官領之甲戌張弘範將兵追宋二王至崖山寨張世傑來拒戰敗之世傑遁去廣王昺偕其官屬俱赴海死獲其金寶以獻丙子詔諭又巴散毛等四洞蠻酋長使降以中書左丞拜奇賁勒密實同知樞密

院事禁中書省文冊奏檢用輝和爾書賜吳樣等局官
吏工匠銀二千兩賜皇子鄂囉齊諸王巴爾達噶下軍
士與思州田師賢所部軍衣服及鈔有差二月戊寅朔
祭先農于籍田壬午陞溧州為路遣使訪求通皇極數
番陽祝泌子孫其甥傅立持泌書來上發民萬戶隸明
里淘金以江南漕運舊米賑軍民之饑者癸未增置五
衛指揮司詔遣托和木哈喇蘇爾托廸括中興戶太火
令王恂等言建司天臺于大都儀象圭表皆銅為之宜

增銅表高至四十尺則景長而真又請上都洛陽等五處分置儀表各選監候官從之甲申平章阿里布乞行中書省檢覈行御史臺文案且請行臺呈行省北御史臺呈中書省例從之以征日本敕揚州湖南贛州泉州四省造戰船六百艘移紹興宣慰司于處州己丑調潭州行省軍五千戍沿海州郡庚寅張弘範以降臣陳懿兄弟破賊有功且出戰船百艘從征宋二王請授懿招討使兼潮州路軍民總管及其弟忠義勇三人為管軍

總管千夫長塔喇海獲文天祥有功請授管軍千戶佩
金符並從之壬辰詔諭宗師張留孫悉主淮東淮西荆
襄等處道教乙未伊蘇特穆爾言行臺文卷令行省檢
覈於事不便詔改之其運司文卷聽御史臺檢覈饒州
路達魯噶齊諤格之擅用羨餘糧四千四百石杖之仍
沒其家詔湖南行省於戍軍還塗每四五十里立安樂
堂疾者醫之饑者廩之死者藁葬之官給其需遣官覈
實益都淄萊濟南逃亡荒地之為行營牧地者禁諸鄂

囉及漢人持弓矢其出征之所持兵仗即輸之官庫壬寅賜太史院銀一千七十八兩癸卯發嘉定新附軍千人屯田托里貝之地甲辰陞大都兵馬都指揮使司秩四品詔大都河間山東管鹽運司並兼管酒醋商稅等課程中書省臣請以真定路達魯噶齊孟古岱為保定路達魯噶齊帝曰此正人也朕將別以大事付之賞汪良臣所部蒙古漢軍收附四川功鈔五萬錠命嘉定以西新附州郡及田楊二家諸貴官子俱充質子入侍車

駕幸上都乙巳命同知太史院事郭守敬訪求精天文
厯數者西蜀四川道立提刑按察司丙午遣使代祀嶽
瀆后土詔河南西京北京等路課程令各道宣慰司領
之賞四川新附軍鈔三千八百五十錠以鄂端境內蒙
古軍耗乏并漢軍新附軍等賜馬牛羊及馬驢價鈔衣
服弓矢鞍勒各有差三月戊申朔詔禁歸德亳壽臨淮
等處畋獵庚戌敕郭守敬繇上都大都厯河南府抵南
海測驗晷景壬子囊嘉特括兩淮造回回礮新附軍匠

六百及蒙古回回漢人新附人能造礮者俱至京師庚申給千戶瑪南部下巴圖軍及土渾川軍屯田牛具丙寅敕中書省凡掾史文移稽緩一日二日者杖三日者死甲戌潭州行省遣兩淮招討司經歷劉繼昌招下西南諸番以龍方零等為小龍蕃等處安撫使仍以兵三千戌之中書省下太常寺講究州郡社稷制度禮官折衷前代叅酌儀禮定擬祭祀儀式及壇壝祭器制度圖寫成書名曰至元州縣社稷通禮上之以保定路旱減

是歲租三千一百二十石夏四月己卯立江西榷茶運
司及諸路轉運鹽使司宣課提舉司癸巳以給事中兼
起居注掌隨朝諸司奏聞事戊戌以池州路達魯噶齊
阿都齊戰功陞招討使兼本軍萬戶癸卯填星犯鍵閉
乙巳汪良臣言昔答順兵犯成都掠其民以歸今嘉定
既降宜還其民成都制曰可敕以上都軍四千衛都城
凡他所來戍者皆遣歸從索多請令泉州僧依宋例輸
稅以給軍餉詔諭揚州行中書省選南軍精銳者二萬

人充侍衛軍併發其家赴京師仍給行費鈔萬六千錠
大都等十六路蝗五月己酉中書省請復授宣慰司官
虎符不允又請各路設提舉同提舉副提舉各一員專
領課程從之辛亥蒲壽庚請下詔招海外諸番不允詔
諭漳泉汀邵武等處暨八十四畝官吏軍民若能舉衆
來降官吏例加遷賞軍民按堵如故以泉州經張世傑
兵減今年租賦之半丙辰以五臺僧多匿逃奴逋賦之
民敕西京宣慰司按察司搜索之命輝和爾界內計畝

輸稅以各道按察司地廣事繁併勸農官入按察司增副使僉事各一員兼職勸農水利事甲子御史臺臣言先是省臣阿里布言有罪者與臺臣美衛同問有旨從之臣等謂行省斷罪以意出入行臺何由舉正宜從行省問訖然後體察為宜制曰可高興侵用宋二王金三萬一千一百兩有奇銀二十五萬六百兩詔遣使追理詔連海等州募民屯田置總管府及提舉司領之乙丑敕江陵等路已圖戶一萬凡千戶置達魯噶齊一員直

隸省部丙寅敕江南僧司文移毋輒入遼臨洮鞏昌通
安等十驛非有海青符不聽乘傳丁卯改雲南寶山崋
渠二縣為州己巳詔沿路驛店民家凡往來使臣不當
乘傳者毋給人畜飲食芻料完都河南七驛民貧乏給
其馬牛羊價鈔千八百錠庚午賜奈曼岱戰功及攻圍
重慶將士及宣慰使劉繼昌等鈔衣服各有差壬申以
呂虎來歸授順慶府總管佩虎符仍賜鈔五十錠徙丁
子峇所駐侍衛軍萬人也田昌平癸酉烏蘭哈達奏言

賦北京西京車牛俱至可運軍糧帝曰民之艱苦汝等
不問但知役民使今年盡取之來歲禾稼何由得種其
止之甲戌給雅蘇克所領工匠牛二千就令運米二千
石供軍詔諭托爾齊等管甘州路宣課諸人毋或沮擾
潭州行省上言瓊州宣慰馬旺已招降海外四州尋有
土寇黃威遠等四人為亂今已擒獲詔置之極刑丙子
進封桑乾河洪濟公為顯應洪濟公命宗師張留孫即
行宮作醮事奏赤章于天凡五晝夜賜皇子鄂囉齊也

勒丹等及千戶巴延岱等所部軍及和州站戶羊馬鈔
有差六月丁丑朔阿哈瑪特言常州路達魯噶齊馬忽
告發浙西按察司事高源不法四十事源亦劾怒事聞
詔令廷辨詔發新附軍五百人蒙古軍百人漢軍四百
人戍碭門魚通黎雅詔諭王相府及四川行中書省四
道宣慰司撫治播川務川西南諸蠻夷官吏軍民各從
其俗無失常業壬午以浙東宣慰使陳祐沒王事命其
子夔為管軍總管佩虎符甲申宋張世傑所部將校百

五十八人詣瓊雷等州來降敕造戰船征日本以高麗
材用所出即其地製之令高麗王議其便以聞乙酉榆
林洪贊刁窩每驛益馬百五十車二百牛如車數給之
丙戌左右衛屯田蝗蝻生庚寅陞濟南府為路壬辰以
叅知政事行河南等路宣慰使呼遜為中書左丞行中
書省事癸巳以新附軍二萬分隸六衛屯田徹爾特穆
爾言其部軍多為盜劫貨財有司不即理斷乞遣官詰
治詔嚕嚕克台往治之以布哈行西川樞密院事總兵

入川平宋諸城未下者仍令東川行樞密院調兵守釣
魚山寨西川既平復立屯田軍官第功陞擢授宣敕金
銀符者百六十一人詔以高州筠連州騰川縣新附戶
於敘州等處治道立驛雲南都元帥愛魯克尼雅斯拉
昴招降西南諸國愛魯克將兵定亦乞不薛尼雅斯拉
昴將大理軍抵金齒蒲驃曲蠟緬國界內招忙木巨木
禿等寨三百籍戶十一萬二百詔定賦租立站遞設衛
送軍軍還獻馴象十二戌戌改宣德府龍門鎮復為縣

庚子拘括河西西番拉木伊克戶辛丑以通州水路淺
舟運甚難命樞密院發軍五千仍令食祿諸官雇役千
人開浚以五十日訖工癸卯以臨洮鞏昌通安等十驛
歲饑供役繁重有質賣子女以供役者命選官撫治之
甲辰以襄陽屯田戶四百代軍當驛役賜征北諸郡蒙
古軍庫庫巴圖等力戰有功者銀五十兩戰死者家給
銀百兩從行伍者鈔一錠其餘衣物有差禁已延徹爾
諸峪寨捕獵免四川差稅以叅知政事行中書省事已

圖爾丹為河南等路宣慰使以阿哈瑪特子呼遜為潭
州行省左丞哈斯哈雅等並復舊職占城馬八兒諸國
遣使以珍物及象犀各一來獻賜諸王所部銀鈔衣服
幣帛鞍勒弓矢及羊馬價鈔等各有差五臺山作佛事秋
七月戊申寧國路新附軍百戶詹福謀叛福論死授告
者何士青總把銀符賜鈔十錠罷西川行省庚戌禁托
克托和斯搜取乘傳者私物乙卯應昌府依例設官置
東宮侍衛軍定江南上中路置達魯噶齊二員下路一

員救發西川蒙古軍七千新附三千付皇子安西王丁
已交趾國遣使來貢馴象已未以德古爾穆蘇之蘇默
岱城為鎮西府救以蒙古軍二千益都軍二千諸路軍
一千新附軍五千合萬人令李庭將之壬戌賞昂吉爾
所部力戰軍人銀五十兩死事者人百兩給其家阿爾
哈雅入覲獻金三千五百八十兩銀五萬三千一百兩
罷潭州行省造征日本及交趾戰船丙寅填星犯鍵閉
癸酉西南八番羅氏等國來附洞寨凡千六百二十有

六戶凡十萬一千一百六十有八詔遣伊聶濟崔或至江南訪求藝術之人以中書左丞行四川行中書省事汪良臣為安西王相賜諸王納爾琿所部有功將校銀鈔衣裝幣帛羊馬有差以趙州等處水旱減今年租三千一百八十一石命薩都修佛事十有五日八月丁丑車駕至自上都庚辰太陰犯房距星戊子范文虎言臣奉詔征討日本北遣周福樂忠與日本僧齋詔往諭其國期以來年四月還報待其從否始宜進兵又請簡閱

舊戰船以充用皆從之海賊賀文達率衆來歸文虎文
虎以所得銀三千兩來獻有旨釋其前罪官其徒四十
八人就以銀賜文虎己丑宋降臣王虎臣陳便宜十七
事令張易等議可者行之庚寅敕沅州路蒙古軍總管
心達罕征取桐木籠犵狁伯洞諸蠻未附者調江南新
附軍五千駐太原五千駐大名五千駐衛州以每歲聖
誕節及元辰日禮儀費用皆斂之民詔天下罷之丁酉
以江南所獲玉爵及坵凡四十九事納于太廟己亥海

賊金通精死獲其從子溫有司欲論如法帝曰通精已死溫何預焉特赦其罪庚子歲星犯軒轅大星甲辰詔漢軍出征逃者罪死且沒其家置大護國仁王寺總管府以賽音扎拉為達魯噶齊李光祖為總管賜范文虎條屬二十一人金紋綾西錦衣賞征重慶將校幣帛有差賜諸王阿濟格糧五千石馬六百疋羊萬口九月乙巳朔范文虎薦可為守令者三十人詔今後所薦朕自擇之凡官守不勤於職者勿問漢人回回皆論誅之且

沒其家女直碩達勒達軍不出征者令隸民籍輸賦已
酉罷金州守船軍千人量留監守餘皆遣還庚戌詔行
中書省左丞呼遜兼領杭蘇等路諸色人匠以杭州稅
課所入歲造繒段十萬以進杭蘇嘉興三路辦課官吏
額外多取分例今後月給食錢或數外多取者罪之阿
哈馬特言王相府官趙炳云陝西課程歲辦萬九千錠所
司果盡心措辦可得四萬錠即命炳總之同知揚州總
管府事董仲威坐贓罪行臺方按其事仲威反誣行臺

官以他事詔免仲威官仍沒其產十之二戊午王相府
言四川宣慰司有籍無軍虛受賞者一萬七千三百八
人命詰治之議罷漢人之為達魯噶齊者御史臺臣言
江南三路管課官於分例外夫用鈔一千九百錠命盡
徵之詔遣使招諭西南諸蠻卽酋長能率所部歸附者
官不失職民不失業乙丑以呼巴哩巴爾斯台為都元
帥將蒙古軍二千人河西軍一千人戍鄂端城己巳樞
密院臣言有唐古特者冒禁引軍千餘人於辰溪沅州

等處劫掠新附人千餘口及牛馬金銀幣帛等而麻陽
縣達魯噶齊鄂博布哈為之鄉導殺斬唐古特鄂博布
哈餘減死論以所掠者還其民給河西行省鈔萬錠
以備夫用冬十月己卯享于太廟辛巳敘州夔府至江
陵界立水驛乙酉帝御香閣命大樂署令完顏椿等肄
文武樂戊子張融訴西京軍戶和買和雇有司匿所給
價鈔計萬八千餘錠官吏坐罪以融為侍衛軍總把千
戶托里總把呼達擅引軍入婺州永康縣界殺掠吏民


事覺自陳扈從先帝出征有功乞貸死救沒入其家貲之半杖遣之辛卯賑和州貧民鈔乙未納碧玉爵于太廟丙申太陰犯太微西垣上將辛丑以月直元辰命五祖真人李居壽作醮事奏赤章凡五晝夜畢事居壽請問言皇太子春秋鼎盛宜預國政帝喜曰尋將及之明日下詔皇太子燕王叅決朝政凡中書省樞密院御史臺及百司之事皆先啟後聞甲辰賜高麗國王至元十七年厯日十一月戊申敕諸路所捕盜初犯賊多者死

再犯賊少者從輕罪論阿哈瑪特言有盜以舊鈔易官庫新鈔四百十錠者議者謂罪不應死盜者之父執役臣家不論如法寧不自畏詔處死壬子遣禮部尚書柴椿偕安南國使杜中贊齎詔往諭安南國世子陳日烜責其來朝癸丑太陰犯熒惑乙卯罷太原平陽西京延安路新簽軍還籍罷招討使劉萬努所管無籍軍願從大軍征討者趙炳言陝西運司郭同知王相府郎中令郭叔雲盜用官錢敕尚書托斯和侍御史郭祐檢覈之

戊辰命湖北道宣慰使劉深教練鄂州漢陽新附水軍
詔諭四川宣慰司括軍民戶數已巳以梧州妖民吳法
受扇惑藤州德慶府瀧水徭蠻為亂獲其父誅之併教
坊司入拱衛司十二月戊寅發粟鈔賑鹽司竈戶之貧
者括甘州戶庚辰安南國貢藥材甲申祀太陽丙申敕
樞密翰林院官就中書省與索多議招收海外諸番事
丁酉巴喇呼貢海青回回等所過供食羊非自殺者不
食百姓苦之帝曰彼吾奴也飲食敢不隨我朝乎詔禁

之詔諭海內海外諸番國主賜右丞張惠銀五千四百兩敕自明年正月朔日建醮于長春宮凡七日歲以為例命李居壽告祭新歲詔諭占城國主使親自來朝索多所遣閣婆國使臣治中趙玉還改單州兗州隸濟寧路復置萬泉縣隸河中府改垣曲縣隸絳州降歸州路為州陞沔陽安陸各為府改京兆為安西路改惠州建寧梧州柳州象州邕州慶遠賓州橫州容州潯州並為路建聖壽萬安寺于京城帝師琳沁卒敕諸國教師禪

師百有八人即大都萬安寺設齋圓戒賜衣是歲斷死
罪百三十二人保定等二十餘路水旱風電害稼



元史卷十

元史本紀卷十考證

至元十五年三月乙未宋廣王昺遣倪堅以表來上

案宋史十五年四月戊辰宋主昺殂於硤洲庚午始立昺則三月不應有昺先遣使之事當係紀載月日有誤

八月己卯初立提刑按察司于輝和爾地案初立原本訛復立考世祖本紀至元十五年以前輝和爾地未嘗設官永樂大典本作初立今據改

十二月己卯朔 案原本脫朔字自己卯至下文戊申
共計三十日則己卯為朔日無疑今增

十二月戊申開成路置屯田總管府廣安州隸之 案
開成原本訛開城廣安州原本訛廣安縣今據地理
志改

十六年正月壬戌改播州鼎山縣為播川縣 案原本
訛改播川鼎山縣為播州縣考地理志廣西路有播
州無播州縣之名今據永樂大典本改

正月甲戌宋廣王昺偕其官屬赴海死 案宋史作二

月癸未與此異

二月庚寅千夫長塔喇海授管軍千戶佩金符 案原

本作總管軍千戶又脫金字今據永樂大典本增改

二月甲辰命嘉定以西新附州郡質子入侍 案新附

原本訛新鄭考地理志嘉定府路州郡無新鄭之名

今據明南監本改

三月丙寅敕中書省掾史文移稽緩三日者死 案丙

寅原本訛丙辰今據前後干支改

六月癸巳詔以高州筠連州新附戶于叙州立驛案

筠字原本訛筠叙州原本訛淑並據地理志改